

Morning Dogri (NSD) Bulletin 29-07-2025

आकाशवाणी

- लोकसभा च आपरेशन सिंदूर पर बैहस अज्ज दुए ध्याड़े बी जारी रौह्ग।
- विदेश मंत्री डॉ. एस जयशंकर होरें आखेआ जे पहलगाम आतंकी हमले मगरा इक तगड़ा ते साफ संदेश देने दी सख्त लोड़ ही।
- श्रीनगर एंकाउंटर च त्रै आतंकवादी मारे गे।
- मौसम मैहकमे नै पूर्वी राजस्थान, बिहार, हिमाचल प्रदेश, मध्य प्रदेश ते पच्छमी उत्तर प्रदेश च केई थाहरें भारी बरखा दी संभावना जताई ऐ।
- भारत च 2020 थमां 2025 बश्कार माली बरे च 12 ज्हार लक्ख करोड़ रपे मुल्ले दे 65 ज्हार करोड़ थमां बढ़ डिजिटल लैन-देन दज्र कीते गे।
- ते दिव्या देशमुख, जॉर्जिया दी बटुमी थाहर हमवतन कोनेरू हमपी गी हराइयै चैस च फिडे महिला विश्व कप दा खिताब जित्ने आहली पैहली भारती महिला बनी गेई ऐ।

<><><><><><>

LS-Op

लोकसभा च अज्ज दुए ध्याड़े बी आपरेशन सिंदूर उप्पर बैहस कीती जाग जदके राज्यसभा च बी आपरेशन सिंदूर उप्पर 16 घंटे तोड़ी चलने आहली बैहस जारी रौह्ग।

कल लोकसभा च बैहसू दी शुरूआत करदे होई रक्षा मंत्री राजनाथ सिंह होरें आखेआ जे सरकार नै पाकिस्तान गी सख्त संदेश दित्ता ऐ जे आतंकवाद ते गल्लबात कन्नोकन्नी नेई होई सकदी।

उनें आखेआ जे पहलगाम च सैलानिएं उप्पर होए दे कायराना हमले दे परते च भारतीय वायु सेना नै पाकिस्तान गी बनकदा परता दिंदे होई 9 आतंकवादी ठिकानें गी तबाह करी दित्ता ते 100 थमां बद्द आतंकवादिएं गी मारी दित्ता। उनें आखेआ जे भारत दी प्रतिक्रिया बिजन उकसावे दी ते नपी-तुली दी ही जेदे तैहत पाकिस्तान च सिर्फ आतंकवादी ठिकानें गी गै निशाना बनाया गेआ। बैहसू च हिस्सा लैंदे होई विदेश मंत्री जयशंकर होरं आखेआ जे पहलगाम हमले मगरा इक स्पष्ट ते तगड़ा संदेश देने दी लोड ही। उनें आखेआ जे सरकार नै पहलगाम हमले सरबंधी ते बन्ने पारा सवां आतंकवादिएं दे इस्तेमाल बारै अंतरराष्ट्री समुदाय गी समझाया। उनें गलाया जे भारती कूटनीति दी एहू जित्त ऐ कि पहलगाम हमले गी अंजाम देने आहले दा रेजिस्टेंट फ्रंट गी अमरीकी सरकार नै आतंकवादी गुट घोषित कीता ऐ। उनें आखेआ जे संयुक्त राष्ट्र च 193 मुल्लखें चा पाकिस्तान दे अलावा छड़ा 3 मुल्लखें आपरेशन सिंदूर दी खिलाफत कीती। कांग्रेस लीडर गौरव गगोई होरें जम्मू-कश्मीर च सुरक्षा चूक उप्पर सुआल पुट्टदे होई आखेआ जे सरकार पहलगाम च कायराना हमला करने आहले आतंकवादिएं गी फगडने च नाकाम रेई ऐ।

बैहस च हिस्सा लैंदे होई समाजवादी पार्टी दे रामाशंकर राजभर होरें बी आखेआ जे पहलगाम हमले दे जिम्मेदार आतंकवादी अजें बी फरार ना।

<><><><><><>

Encounter

श्रीनगर दे दाचीगाम इलाके दे जंगलें च सुरक्षाबलें ते आतंकवादिएं बश्कार होए दे टाकरे च त्रै बेपंछानू आतंकवादी मारे गे ना। श्रीनगर आधारित सेना दी चिनार कोर नै जानकारी दित्ती ऐ जे अभियान अजें जारी ऐ। आतंकवादिएं दा किस गुट कन्नै सरबंध ऐ ते उंदी पंछान केहू ऐ, इस बारै अजें पता लाया जा'रदा ऐ।

सुरक्षाबलें पहलगाम आतंकवादी हमले जेदे च 26 लोक मारे गे हे, मगरा इस लेई जिम्मेदार आतंकवादिणं दी धरपकड लेई इक व्यापक अभियान रम्भेआ। पिछले इक म्हीने थवां हासिल होआ'रदी खुफिया जानकारिणं मूजब आतंकवादी श्रीनगर शैहर थवां 20 किलोमीटर अंदर जंगलें च नस्सी गेदे ना। तोआई, सेना दी उत्तरी कमान प्रमुख लेफ्टिनेंट जनरल प्रतीक शर्मा होरें चिनार कोर दी उंदी कार्रवाई लेई सिफत कीती।

<><><><><><>

Weather

मौसम विभाग नै पूर्वी राजस्थान, बिहार, हिमाचल प्रदेश, मध्य प्रदेश ते पश्चिमी उत्तर प्रदेश च कूदे कूदे बडी मती तेज वरखा पौने दा अनुमान जाहिर कीता ऐ। दिल्ली, हरियाणा, चंडीगढ़, गुजरात, कर्नाटक, ओडिशा, पश्चिम बंगाल च गंगा दे तटीय क्षेत्र, झारखंड, केरल, माहे ते पूर्वोत्तर राज्यें दे किश हिस्सें च भी दिन भर दरमेयाने दर्जे थवां तेज वरखा होने दी संभावना ऐ। मौसम विभाग नै अज्ज अंडमान ते निकोबार द्वीप समूह, बिहार, जम्मू ते कश्मीर, लद्दाख, पश्चिम बंगाल, झारखंड, सिक्किम ते ओडिशा दे किश हिस्सें च गरज-चमक ते तेज हवा कन्नै बौछार पौने दी बी संभावना जाहिर कीती ऐ। वसंत विहार सनें राष्ट्रीय राजधानी दिल्ली दे केई हिस्सें च कल राती तेज वरखा मगरा थाहरें थाहरें पानी भरी गया ऐ।

<><><><><><>

India-Digital

देश च माली बरे 2020 सोया 2025 बश्कार 65 हजार करोड़ सोयां मता डिजिटल लेन-देन कीता गेआ ऐ। जिनदी राशि 12 हजार लख करोड़ रुपे थवा मता ऐ। वित्त राज्य मंत्री पंकज चौधरी होरें कल लोकसभा च लिखित परते च एहू जानकारी दिती। उने आक्खेआ जे सरकार खास तौर पर टियर-2 ते टियर-3 शहरें च डिजिटल भुगतान गी बढ़ावा देने आस्तै भारतीय रिजर्व बैंक, भारतीय राष्ट्रीय भुगतान निगम, फिनटेक कंपनियें, बैंकें ते राज्य सरकारें सनें हितधारकें कन्ने रलिए कम्म करा र दी ऐ।

श्री चौधरी होरें आक्खेआ जे इस जतन गी बढ़ावा देने आस्तै रिजर्व बैंक नै टियर-3 सोयां टियर-6 शहरें, पूर्वोत्तर राज्यें ते जम्मू-कश्मीर च डिजिटल भुगतान स्वीकृति बुनियादी ढांचे दी तैनाती गी प्रोत्साहित करने आस्तै 2021 च भुगतान अवसंरचना विकास कोष-पीआईडीएफ शुरू कीता। 31 मई, 2025 तक पीआईडीएफ पैहल दे तैहत लगभग 4 करोड़ 77 लख डिजिटल टच पॉइंट स्थापित कीते जाई चुके दे हे। श्री चौधरी होरें आक्खेआ जे यूपीआई जनेह प्लेटफॉर्म कन्ने नागरिकें, लोहके विक्रेताएं ते ग्रामीण उपयोगकर्ताएं गी डिजिटल भुगतान स्वीकार करने आस्तै सशक्त बनाया ऐ जिसदे कन्ने नकदी पर निर्भरता घट्ट होई ऐ ते मते लोक औपचारिक वित्तीय पारिस्थितिकी तंत्र क्ने जुडे ना। डिजिटल वित्तीय लेन-देन दे नजीते च औपचारिक दौहार तगर पुज्ज च बी सुधार होआ ऐ, जिसदे कन्ने आर्थिक भागीदारी ते समावेशन गी बढ़ावा थहोआ ऐ। चौधरी होरें आक्खेआ जे डिजिटल भुगतान दी बददी पुज्ज नै वित्तीय सेवाएं गी सखल्ला बनाने च परिवर्तनकारी भूमिका निभाई ऐ।

<><><><><><>

Trump Dead line Russia

अमरीकी राष्ट्रपति डोनाल्ड ट्रम्प होरें यूक्रेन च युद्ध विराम पर सहमति आस्तै रूस गी दस या 12 दिने दी नमी समें सीमा दिती ऐ। श्री ट्रंप होरें आखेआ ऐ जे हुन होर इंतज़ार करने दी कोई बजह नेई ऐ।

कि जे शांति दी दिशा च कोई प्रगति नेई होई ऐ। श्री ट्रम्प होरें दो हफते पैहले आखेआ हा जे युद्ध खतम करने आस्तै राष्ट्रपति व्लादिमीर पुतिन हुन्दे कश 50 दिन दा समें ऐ जेकर इयां नेई होआ तां फीहू उनें गी कड़े शुल्क दा सामना करना पौगा। ट्रम्प होरें स्कॉटलैंड च संवाददाता सम्मेलन च रूस पर प्रतिबंध ते बादू शुल्क लाने दी धमकी गी दोहरान्दे होई आखेआ हा जे नमी समें सीमा दी पुष्टि मंगलवारें कीती जाग। अमरीकी राष्ट्रपति होरें इसदे पैहले जुलाई च आखेआ हा जे रूस कन्नै व्यापार करने आहले देशें पर 100 फीसद शुल्क लाडन।

<><><><><><>

Iran

ईरान दे विदेश मंत्री होरें चेतावनी दिती ऐ जेकर अमरीका ते इजराइल नै ईरान उप्पर दोबारा हमला कीता ते ईरान ज्यादा तगड़ेयाई कन्नै परता देग। ईरान दे विदेश मंत्री हुंदी एहू प्रतिक्रिया अमरीका दे राष्ट्रपति डोनाल्ड ट्रम्प दे उस बयानै मगरा आई जेदे च उनें आखेआ जे अमरीका इस्लामिक मुल्ख ईरान दे परमाणु प्रोग्राम गी पूरी चाल्ली नष्ट करी देग। विदेश मंत्री अब्बास अरामची होरें आखेआ जे ईरान उप्पर कार्रवाई कीती गेई ते ईरान बी फैसलाकुन परते सवां पिच्छे नेई हटोग।

<><><><><><>

UN

संयुक्त राष्ट्र दे महासचिव एंटोनियो गुतेरेस होरें चेतावनी दिती ऐ जे इजराइल ते फिलीस्तीन दी जंग काफी नाजुक मोड़ उप्पर पुज्जी गई ऐ। उनें न्यूयार्क च शांति सम्मेलन दरान आखेआ जे तुरत ते फैसलाकुन कार्रवाई दी लोड़ ऐ। उनें फिलीस्तीन दा शांतिपूर्ण ढंगे कन्नै हल पुट्टने लेई अंतरराष्ट्री सम्मेलन आयोजित करने लेई फ्रांस ते साउदी अरब दी सराहना कीती। उनें इस सम्मेलन गी शब्दें थमां बढियै कार्रवाई तोड़ी जाने दा दुर्लभ मौका दस्सेआ।

<><><><><><>

Chess-Update

जार्जिया दे बटुमी च फिडे महिला विश्व कप 2025 दे फाइनल च भारत दी गै कोनेरू हम्पी गी हराइयै इतिहास रची दिता ऐ। इस जित्त कन्नै दिव्या देशमुख ग्रैंडमास्टर दा खिताब हासल करने आहली चौथी भारती महिला बनी गेइयां न। प्रधानमंत्री नरेंद्र मोदी होरें शतरंज खडारी दिव्या देशमुख दी उपलब्धि दी सराहना कीती ऐ। मोदी होरें सोशल मीडिया पोस्ट च आखेआ जे दिव्या देशमुख, 2025 फिडे महिला विश्व कप जीतने दे कन्नै गै ग्रैंडमास्टर भी बनी गई ऐ। उने आखेआ जे दिव्या दी उपलब्धि केई लोकें गी प्रेरित करौग ते युवाएं बश्कार शतरंज ही होर बी लोकप्रिय बनाग।

<><><><><><>